



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՄՐՑԱԿՑՈՒԹՅԱՆ ՊԱՇՏՊԱՆՈՒԹՅԱՆ ՀԱՆՁՆԱԺՈՂՈՎԻ
ԳԼԽԱՎՈՐ ՔԱՐՏՈՒՂԱՐ

Հայաստանի Հանրապետություն, 0010, ք. Երևան, Տիգրան Մեծի 4, հեռ.՝ (+374 60) 830 – 840, (+374 60) 830 850
Էլ-փոստ՝ info@competition.am, վեբ կայք՝ <http://www.competition.am>

ք. Երևան

19 դեկտեմբերի 2024թ.

ՈՐՈՇՈՒՄ
ՄՊՀ-ԳՔ-2024/1

«ՍԱԱՄ-ԱՌԻԴԻՏ» փակ բաժնետիրական ընկերությանը գնումների գործընթացին մասնակցելու իրավունք չունեցող մասնակիցների ցուցակում ներառելու վերաբերյալ

Գնման ընթացակարգի ծածկագիր՝ «ՄՊՀ-ԷԱՃԾՁԲ-24/17»

Մասնակից՝ «ՍԱԱՄ-ԱՌԻԴԻՏ» ՓԲԸ

(ՀՎՀՀ՝ 04113698, հասցե՝ ՀՀ, Արարատի մարզ, ք. Վեդի, Արարատյան փող., շ. 55)

Մրցակցության պաշտպանության հանձնաժողովի (այսուհետ նաև՝ **Հանձնաժողով** կամ **Պատվիրատու**) և «ՍԱԱՄ-ԱՌԻԴԻՏ» փակ բաժնետիրական ընկերությունը (այսուհետ նաև՝ **Կատարող**) միջև 2024 թվականի ապրիլի 15-ին ներքին աուդիտի ծառայությունների (այսուհետ նաև՝ **Ծառայություն**) մատուցման նպատակով կնքվել էր թիվ «ՄՊՀ-ԷԱՃԾՁԲ-24/17» պայմանագիրը (այսուհետ նաև՝ **Պայմանագիր**):

Պայմանագրով Կատարողը պարտավորություն էր ստանձնել իրականացնել Հանձնաժողովի իրավաբանական վարչության, անբարեխիղճ մրցակցության վերահսկողության վարչության, անձնակազմի կառավարման բաժնի և գնումների գործընթացի համապատասխանության աուդիտը:

Պայմանագրի 2-րդ մասի 1-ին կետի 3-րդ ենթակետի համաձայն՝ Պատվիրատուն իրավունք ունի միակողմանի լուծել պայմանագիրը, եթե Կատարողն էականորեն խախտել է պայմանագիրը: Կատարողի կողմից պայմանագիրը խախտելն էական է համարվում, եթե՝

ա) մատուցված ծառայությունը չի համապատասխանում պայմանագրի N 1 հավելվածով սահմանված պահանջներին,

բ) խախտվել է ծառայության մատուցման ժամկետը:

Պայմանագրի անբաժանելի մաս հանդիսացող Հավելված 1-ով սահմանված «Տեխնիկական բնութագիր – Գնման ժամանակացույց»-ի համաձայն՝ Պայմանագրի վերջնաժամկետն է 2024 թվականի դեկտեմբերի 25-ը, մինչդեռ Պայմանագրի կնքումից հետո Կատարողը չի ներկայացել Հանձնաժողով և փաստացի մինչև սույն ծանուցման

օրը չի իրականացրել Ծառայության մատուցմանն ուղղված որևէ գործողություն: Մասնավորապես՝ Պայմանագրի անբաժանելի մաս հանդիսացող տեխնիկական բնութագրի «Ծառայության ընդունման և վճարման ժամանակացույցը» վերտառությամբ 6-րդ գլխով, ի թիվս այլնի, նախատեսված է Կատարողի կողմից սահմանված ժամկետներում եռամսյակային հաշվետվությունների ներկայացման պարտականությունը:

Մինչդեռ, Կատարողի կողմից Պայմանագրի կնքման օրվանից մինչև Պայմանագիրը միակողմանի լուծելու ծանուցման օրը չի կատարվել Ծառայության մատուցմանն ուղղված որևէ քայլ: Հաշվի առնելով Պայմանագրի առարկան՝ Կատարողը Ծառայության պատշաճ մատուցման շրջանակում պետք է ներկայանար Հանձնաժողով, ծանոթանար համապատասխանության աուդիտի ենթակա միավորների հետ և իրականացներ համապատասխան գործառույթներ:

Նման պայմաններում Կատարողի կողմից մինչև Պայմանագիրը միակողմանի լուծելու ծանուցման օրը եռամսյակային հաշվետվություններ չներկայացնելը, Հանձնաժողով չներկայանալը, փաստացի ներքին աուդիտի միջավայրին և համապատասխանության աուդիտի ենթակա միավորներին չծանոթանալը և դրան ուղղված որևէ քայլ չձեռնարկելը ողջամտորեն ակնհայտ են դարձնում առհասարակ Ծառայության մատուցման անհնարինությունը:

Այսինքն՝ Կատարողը թույլ է տվել Պայմանագրի էական խախտումներ՝ չի մատուցել Ծառայություն, որի հաշվառմամբ՝ Պատվիրատուն 2024 թվականի դեկտեմբերի 10-ին միակողմանի լուծել է Պայմանագիրը, որի մասին ծանուցումը նույն օրը հրապարակվել է տեղեկագրում, ինչպես նաև Պայմանագրի 7-րդ մասի 9-րդ կետի համաձայն ուղարկվել է Կատարողի էլեկտրոնային փոստի հասցեին:

«Գնումների մասին» օրենքի 6-րդ հոդվածի 1-ին մասի 6-րդ կետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը և մասնակիցը հրավերով և (կամ) պայմանագրով սահմանված ժամկետում չի վճարել հայտի, պայմանագրի և (կամ) որակավորման ապահովման գումարը,

բ. որպես ընտրված մասնակից հրաժարվել կամ զրկվել է պայմանագիր կնքելու իրավունքից:

«Գնումների մասին» օրենքի 6-րդ հոդվածի 2-րդ մասի համաձայն՝ լիազորված մարմինը մասնակցին ներառում է գնումների գործընթացին մասնակցելու իրավունք չունեցող մասնակիցների ցուցակում պատվիրատուի ղեկավարի պատճառաբանված

որոշման հիման վրա: Սույն մասում նշված որոշումը պատվիրատուի ղեկավարը կայացնում է գնման ընթացակարգը չկայացած հայտարարվելու կամ կնքված պայմանագրի վերաբերյալ հայտարարությունը հրապարակելու կամ պայմանագիրը միակողմանի լուծելու մասին հայտարարությունը հրապարակելու օրվան հաջորդող տասն օրվա ընթացքում: Որոշումը կայացվելուն հաջորդող օրը այն տրամադրվում է լիազորված մարմնին և մասնակցին:

Մինչույն ժամանակ, Կատարողը ծանուցվել է, որ

- «Գնումների մասին» օրենքի 6-րդ հոդվածի 2-րդ մասի նախատեսված լիազորված մարմնին որոշումը ներկայացվելու վերջնաժամկետը լրանալու օրվա դրությամբ մասնակցի կամ պայմանագիրը կնքած անձի կողմից պայմանագրի և (կամ) որակավորման ապահովման գումարը վճարված լինելու դեպքում պատվիրատուն տվյալ մասնակցին ցուցակում ներառելու պատճառաբանված որոշումը չի ներկայացնում լիազորված մարմին.

- մասնակցի կամ պայմանագիրը կնքած անձի կողմից պայմանագրի և (կամ) որակավորման ապահովման գումարի վճարումն լիազորված մարմնին որոշումը ներկայացվելու վերջնաժամկետը լրանալուց հետո, բայց ոչ ուշ, քան մասնակցին կամ պայմանագիր կնքած անձին ցուցակում ներառելու վերջնաժամկետը լրանալու օրը իրականացված լինելու դեպքում, պատվիրատուն դրա մասին գրավոր տեղեկացնում է լիազորված մարմին, որի հիման վրա մասնակիցը չի ներառվում ցուցակում:

Մինչդեռ, սույն որոշման ընդունման պահի դրությամբ Կատարողի կողմից համապատասխան գումարների վճարված լինելու վերաբերյալ տվյալներ առկա չեն:

Ողջ վերոգրյալի հաշվառմամբ և ղեկավարվելով «Գնումների մասին» օրենքի 6-րդ հոդվածի 2-րդ մասով՝

ՈՐՈՇԵՑԻ

«ՍԱԱՄ-ԱՈՒԴԻՏ» փակ բաժնետիրական ընկերությանը ներառել գնումների գործընթացին մասնակցելու իրավունք չունեցող մասնակիցների ցուցակում:


 ԱՐՄՏ ԿԱՀԱՆՅԱՆ